



Ministro das Finanças, Rui Augusto Gomes

### **Governu Submete ba Parlamentu Nasionál, Lei das Grandes Opções do Plano 2023**

Díli, 10 maiu 2022 – Ministru Finansas, Rui Gomes akompaña husi Ministru Asuntu Parlamentár no Komunikasaun Sosiál, Francisco Jerónimo no Ministru Koordinadór Asuntu Ekonómiku, Joaquim Amaral, ohin lokraik, entrega ona Ezbosu Lei das Grandes Opções do Plano 2023 ba Sua Exelénsia Prezidente Parlamentu Nasionál, Aniceto Longuinhos Guterres Lopes.

Grandes Opções do Plano 2023 inklui medidas prinsipál iha área estratéjiku 16 ne'ebé Governu sei foku iha 2023: i) Agrikultura, pekuária, peskas no floresta; ii) Ekonomia no empregu; iii) Turizmu; iv) Dezenvolvimentu rural no Abitasaun; v) Ambiente; vi) Petróleu no minéral; vii) Eletridade no enerjia renovável; viii) Konektividade nasional; ix) Bee no saneamentu; x) Edukasaun no formasaun; xi) Saúde; xii) Inkluzau no protesaun sosiál; xiii) Kultura no patrimóniu; xiv) Reforma Estadu; xv) Defeza no seguransa nasional; xvi) Relasaun internasionál no polítika esterna.

"Lei Foun Enkuadramentu Orsamentál ejize mudansa iha Ita-nia prosesu elaborasaun OJE ne'ebé agora prevê ezisténsia Lei das Grandes Opções do Plano. Lei ne'e nia objetivu ida mak ba Parlamentu Nasionál atu aprova opsaun anuál no plurianuál em termos planeamentu ne'ebé sei fó impaktu ba iha OJE no programasaun orsamentu plurianual," Ministru Rui Gomes hateten. "Ho Lei das Grandes Opções do Plano ne'e signífika iha reforsu substansiál ba iha poder Parlamentu Nasionál relaciona ho prosesu orsamentál ne'ebé envolve Parlamentu Nasionál desde inisiu prosesu elaborasaun OJE."

Governante ne'e hatutan tan katak orsamentu hodi finansia medidas prinsipál iha área estratéjiku 16 ne'e sei kontempla iha Proposta OJE 2023. Nia objetivu prinsipál mak atu konkretiza PEDN, Programa Oitavu Governu Konstitusionál, inklui planu médiu prazu no planu anuál husi Servisus no Entidades Setór Públiku Administrativu.

Tuir kalendáriu elaborasaun OJE 2023 bazeia ba Lei Enkuadramentu Orsamentál, Parlamentu Nasionál no Governu sei diskute ezbosu Lei ne'e no aprova iha loron 30 fulan-maiu 2022.

Depoide hetan ona aprovasaun, Parlamentu Nasionál sei haruka Diploma ne'e ba Prezidente Repúblika atu tetu.

Iha loron 9 fulan-maiu, Konsellu Ministrus hala'o Sorumutuk Estrordináriu no aprova ona Proposta Projetu Lei das Grandes Opções do Plano 2023 ne'ebé apresenta husi Ministru Finansas, Rui Gomes.

Akompaña Ministru Rui Gomes, Diretór Jerál Planeamentu no Orsamentu, Jose Alexandre de Carvalho, Diretór Gabinete Apoiu Jurídiku, Isac Menezes no Diretór Nasionál Orsamentu, Salomão Yoaquim.